



Број: 01/2а-50-3-2-41/13

Сарајево, 8.10. 2013.

**Predmet: Zabilješka sa sastanka predsjedavajućeg Komisije za vanjske poslove Predstavničkog doma PSBiH Mirze Kušljugića s Jurgisom Vilcinskasom, šefom političko-informacionog sektora Delegacije Evropske unije u BiH**

U ponedjeljak, 7.10.2013., održan je sastanak predsjedavajućeg Komisije za vanjske poslove Predstavničkog doma PSBiH Mirze Kušljugića s Jurgisom Vilcinskasom, šefom Političko-informacionog sektora Delegacije Evropske unije u BiH.

Sastanku su prisustvovali i Stjepan Krešić, prvi zamjenik predsjedavajućeg Komisije za vanjsku i trgovinsku politiku, carine, saobraćaj i komunikacije Doma naroda PSBiH, Amila Ibrićević, savjetnica za političke i ekonomske poslove pri Delegaciji Evropske unije u BiH, Maja Ribar, politička savjetnica pri Delegaciji Evropske unije u BiH, Merdžana Iglica, sekretar Komisije za vanjske poslove PDPSBiH, i Nenad Pandurević, sekretar Komisije za vanjsku i trgovinsku politiku, carine, saobraćaj i komunikacije Doma naroda PSBiH.

**Mirza Kušljugić** upoznao je gosp. Jurgisa Vilcinskasa sa inicijativom da se održi tematska sjednica o ispunjavanju obaveza iz Sporazuma o Energetskoj zajednici, kojoj bi prisustvovali predstavnici Delegacije Evropske unije u BiH, te da su za to zainteresirani i predstavnici Energetske zajednice. Dodao je da je Komisija za vanjske poslove PDPSBiH, u saradnji s odgovarajućim komisijama tri susjedne zemlje, Srbije, Hrvatske i Crne Gore do sada održala tri sastanka o intenzivnijoj regionalnoj saradnji, gdje je prihvaćeno da PSBiH preko Komisije za vanjske poslove PD potencira moguće oblasti saradnje u oblasti energetike. Kazao je da je na osnovu te naše inicijative Energetska zajednica u julu u Beču organizirala sastanak parlamentaraca zemalja potpisnica Sporazuma o Energetskoj zajednici, kojem su prisustvovali predstavnici svih zemalja osim BiH, zbog blokade rada PSBiH. Na tom sastanku odlučeno je da svaki izvještaj koji bude publiciran bude predstavljen parlamentima, komisijama ili na tematskim sjednicama. Mirza Kušljugić kazao je kako smatra da bi na ovakve tematske sjednice trebalo pozvati i predstavnike odgovarajućih odbora iz Federacije BiH i Republike Srpske. Uvažavajući da Energetska zajednica ima puno članova i da direktor Energetske zajednice želi prisustvovati svakom predstavljanju izvještaja, utvrđen je datum održavanja ovakve tematske sjednice u PSBiH, i to 26.11.2013., kazao je Kušljugić. Naglasio je da je krajnje vrijeme da od Energetske zajednice i Evropske komisije dobijemo odgovor koji će glasiti da za zemlje potpisnice Energetske zajednice nema derogacije LCP direktive, kojom se regulira zaštita okoliša, te da je jedina ambicija da se parlamentarci kvalitetno upoznaju s tim šta je potpisano i šta su obaveze zemalja članica Energetske zajednice.

**Jurgis Vilcinskas** kazao je da on potpuno razumije važnost i vrijeme podnošenja ovakve inicijative, te da bi parlamentarci trebalo pažljivije da prate rad ili propuste vlade, odnosno Vijeća ministara BiH na polju energetike i da ovakve probleme stave u fokus parlamentaraca i medija. Upitao je gosp. Kušljugića da li je ideja da se na tematskoj sjednici razgovara o svim izvorima energije, kao što su: gas, električna energija, nafta. Kušljugić je kazao da ne zna šta će biti u izvještaju Energetske zajednice, ali da bi se on fokusirao na stvari koje su pred nama u narednih četiri-pet godina i da tu prvenstveno misli na elektroenergetiku.

**Amila Ibričević** kazala je da su izvještaji Energetske zajednice obično strukturirani da objašnjavaju poglavlja u kojima postoje obaveze, te da će se ta prezentacija fokusirati na to šta je urađeno u sektoru električne energije, gasa, okoliša, obnovljivih izvora energije, nafte i socijalni dio svega toga. Dodala je da je neosporno je da će se raspravljati o gasu zato što je 24.10. 2013. zakazana sjednica Ministarskog vijeća Energetske zajednice na čijem dnevnom redu će biti prvi put u historiji Energetske zajednice neispunjavanje obaveza jedne zemlje i nepostojanje namjere da se te obaveze ispune, a ta zemlja je BiH. Očekuje se da će Vijeće Energetske zajednice tada donijeti neku vrstu zaključka o tome šta se očekuje od BiH, kazala je Amila Ibričević. Istaknula je da Evropska komisija upravo sada finansira i završava projekat koji se bavi izradom nacrtu zakonodavnog okvira koji transponira obaveze koje proizilaze iz trećeg energetskog paketa Evropske unije, koji BiH ima obavezu da provede do 2015. godine. Neke od tih akata će i Parlamentarna skupština BiH morati pregledati i usvajati, dodala je Amila Ibričević. Predložila je da, ako je potrebno, neko od konsultanata da objašnjenje šta je to što BiH u svjetlu Energetske zajednice treba da uradi.

**Mirza Kušljagić** kazao je da je moguće obaveze preuzimati mimo parlamenta, ali ih nije moguće provesti bez parlamenta, te da će na kraju neki propisi morati doći u PSBiH i u tom smislu se na toj tematskoj sjednici treba obratiti PSBiH. Dodao je da se treba dogovoriti kako da tematska sjednica bude efikasna.

**Jurgis Vilcinskis** dodao je da će Evropska komisija učestvovati u prezentaciji, ali da je ključna uloga sekretara Energetske zajednice.

**Mirza Kušljagić** kazao je da je cilj da za početak to bude prezentacija izvještaja Energetske zajednice, te da potaknemo i informiramo parlamentarce o problemima vezanim za energiju i da se nada da ćemo imati dobru koordinaciju s Evropskom komisijom.

SEKRETAR  
KOMISIJE ZA VANJSKE POSLOVE

Merdžana Iglica

Dostavljeno:

- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Ministarstvo vanjske trgovine i ekonomskih odnosa BiH
- USAID/REAP
- a/a